

मार्निंग डोगरी न्यूज़ बुलेटिन, समें. **09-20** Hrs

<><><><><><>

Headlines

1. प्रधानमंत्री नरेन्द्र मोदी होर अज्ज मुंबई च वर्ल्ड आडियो वियूल एंटरटेनमेंट सुमित वेक्स 2025 दा उद्घाटन करगन।
2. उपराज्यपाल मनोज सिन्हा होरें उच्च सतह दी बैठक दरान मजूदा सुरक्षा स्थिति दा जायजा लैता। गोआंढ थमां आतंकवाद दी जड़ गी खत्म करने लेई गलाया। उनें आखेआ जे इस मिशन गी पूरा करने लेई पूरी निष्ठा कन्नै कम्म करना लोड़चदा।
3. उपमुख्यमंत्री होरें नौशेहरा दी भवानी-ए पंचैत लोकें तगर पुज्ज बनाने आले इक शिविर च हिस्सा लैता। उनें पंचैत घर भवानी-ए दे निर्माण लेई नीह पत्थर रखेआ।
4. सेहत सचिव होरें बालताल दा दौरा लाया ते औंदी श्री अमरनाथ जी दी यात्रा लेई मैडिकल तैआरिएं दा जायजा लैता।
5. श्रीनगर ब्हाई अड्डे थमां हज्ज श्रद्धालुएं दी पैहली डोआरी 4 मई गी रवाना होग।

<><><><><><>

भारत अज्ज मुंबई च पैहले विश्व ऑडियो-विजुअल मनोरंजन शिखर सम्मेलन यानि वेक्स –2025 दी मेजबानी करग। प्रधानमंत्री नरेन्द्र मोदी होर च'उं दिनें दे इस सम्मेलन दा उद्घाटन करडन। एह समारोह ऑडियो विजुअल ते मनोरंजन उद्योग दे भविष्य उपपर चर्चा लेई इक आलमी मंच उपलब्ध करोआग। सम्मेलन दा विशे-सार ऐ 'कनेक्टिंग क्रियेटर्स, कनेक्टिंग कंट्रीज'। सम्मेलन दा उद्देश्य भारत गी मीडिया, मनोरंजन ते डिजिटल नवाचार दे वैश्विक केंद्र दे रूपै च स्थापित करना ऐ। एहदे च फिल्में, ओटीटी, गेमिंग, कॉमिक्स, डिजिटल मीडिया, आर्टिफिशियल इंटेलिजेंस, प्रसारण ते उभरदी तकनीकें गी कन्नै लेइयै इस खेत्तर च भारत दी समर्थ दा प्रदर्शन कीता जाह्ग। प्रधानमंत्री नरेन्द्र मोदी होर क्रिएटोस्फीयर दा बी दौरा करडन ते इंडिया चैलेंजेस थमां चुने गेदे क्रिएटर्स कन्नै गल्लबात करडन।

<><><><><><>

LG-Meeting

उपराज्यपाल मनोज सिन्हा होरें बुधवारें केन्द्र शासत प्रदेश च मजूदा सुरक्षा स्थिति दी समीक्षा लेई वरिष्ठ अधिकारिएं कन्नै उच्च स्तरीय बैठक दी अध्यक्षता कीती। आकाशवाणी जम्मू दे संवाददाता दी रिपोर्ट मूजब

उपराज्यपाल होरें आतंकवाद ते एह्दे पूरी ढांचे गी जम्मू कश्मीर थमां पूरी चाल्ली खत्म करने लेई सख्त कदम चुक्कने दे निर्देश दित्ते। बैठक च उपराज्यपाल होरें आखेआ जे साढ़े गोआंढी देश थमां निकलने आले आतंकवाद दी जड़ गी खत्म करना जम्मू कश्मीर दे लोकें ते देसै दा सामूहिक संकल्प ऐ ते असेंगी इस मिशन गी पूरा करने लेई संकल्प लैना लोड़चदा। उपराज्यपाल होरें पुलस गी आखेआ ऐ जे ओह आवेर ग्राउंड वर्करें खलाफ सख्त कारवाई करन, जेह्ड़े आतंकवादिएं गी रसद उपलब्ध करोआंदे न, मदद करदे न। इस बैठक च डीजीपी जम्मू कश्मीर नलिन प्रभात, प्रिंसिपल सैक्रेटरी चन्द्रशेखर भारती ते होर दुए वरिष्ठ अधिकारी शामिल हे।

<><><><><><>

Dy.CM-Public Darbar

उपमुख्यमंत्री सुरिन्दर चौधरी होरें नौशेहरा च भवानी-ए पंचैत च लोकें तगर पुज्ज बनाने आले इक शिविर च हिस्सा लैता। इस दरान मकामी लोकें केई सारी मंगें गी उंदे अग्गे रखेआ, जेह्दे च बाद्ध बंकर बनाना, जम्मू कश्मीर बैंक दी शाखा ते एटीएम सुविधा बगैरा शामिल हा। उनें भवानी थमां किला दरहाल तगर दी शिड़क लेई मुआवजा देने दी बी मंग कीती। उपमुख्यमंत्री होरें मकामी लोकें गी भरोसा दोआया जे उंदी जायज मंगें गी समें सिर हल कीता जाग। उपमुख्यमंत्री होरें भवानी-ए पंचैत घर दे निर्माण लेई नीह पत्थर बी रखेआ। एह्दा निर्माण 30 लक्ख रपे दी अंदाजन जागत कन्नै राष्ट्रीय ग्राम ज़वराज अभियान तैह्त् कीता जाग। इस मौके पर उनें किट्ठे गी संबोधत बी कीता। पहलगाम आतंकी हमले दा जिक्र करदे होई उपमुख्यमंत्री सुरिन्दर चौधरी होरें आखेआ।

<><><><><><>

Sakeena-Greetings

शिक्षा मंत्री सकीना इत्तू होरें 12मीं जमात पास करने आले विद्यार्थिएं गी मुबारकबाद दित्ती ऐं कल 12मीं जमात दे नतीजे घोशत कीते गे। अपने सनेए च सकीना इत्तू होरें विद्यार्थिएं दी मेहनत, उंदी निष्ठा ते पढ़ने दी उंदी ललक दी सराहना कीती। मंत्री होरें कुड़िएं दी जागतें थमां बेहतर कारकरदगी दस्सने लेई सिफ्त कीती। कुड़िएं दी पास होने दी फीसद ते शीर्ष थाहर च बी कुड़िएं बेहतर कीता ऐ। उनें आखेआ जे कुड़िएं हर क्षेत्र च बेहतर करा'रदियां न। ओह बच्चे जेह्ड़े इनें मतेयानें च बेहतर नेई करी सके, उनेंगी बी पढ़ने ते होर बेहतर करने लेई प्रेरित कीता। उनें इनें बच्चें गी आखेआ जे ओह भविष्य दे होर मौकें पर ध्यान केन्द्रित करन ते लगगे रौहन।

<><><><><><>

Admn Secretary

सरकार नै बुधवारें हुक्म दित्ता ऐ जे प्रशासनिक सचिव नै यूटी स्तर दे विभागें दे प्रधान, सिविल सचिवालय श्रीनगर थमां सामवार 5 मई 2025 थमां कम्म करगन। आकाशवाणी जम्मू दे संवाददाता दी रिपोर्ट मूजब इस सरबंघै च GAD आस्सेआ जारी कीते गेदे इक आर्डर च आखेआ गेआ ऐ जे प्रशासनिक सचिव ते मैह्कमे दे प्रधान 5 मई थमां श्रीनगर सिविल सचिवालय च अपनी हाजरी गी जकीनी बनान ते समें समें उप्पर सिविल सचिवालय जम्मू च बी अपनी हाजरी देंगन।

<><><><><><>

Secy Health-Baltal

औंदी श्री अमरनाथ जी दी यात्रा दरान सेह्त सरबंघी सहूलतें दा जायजा नैने लेई सेह्त ते मैडिकल शिक्षा मैह्कमे दे सचिव डॉ. सईद आबिद रशीद शाह होरें बालताल आले आधार शिविर ते सोनामर्ग स्थित बुनियादी सेह्त केन्द्र दा दौरा लाया। सचिव होरें आधार शिविर बालताल च 100 बिस्तरे दी समर्थ आले अस्पताल च मैडिकल सहूलतें ते पीएचसी सोनामर्ग दे बक्ख—बक्ख सीगें दा दौरा लाया ते सहूलतें दा जायजा लैता। उनें यात्रा शुरू होने थमां पैहले सारी मैडिकल सेवाएं आली सहूलतें गी पूरा करने दी जरूरता पर जोर पाया। उनें बालताल आधार शिविर ते बुनियादी सेह्त केन्द्र सोनामर्ग बश्कार तालेमल बनाई रखने पर बी जोर पाया।

<><><><><><>

Comm/Secy Housing

घरें मकानें ते शैहरी विकास मैह्कमे दी आयुक्त सचिव मंदीप कौर नै जम्मू नगर निगम दे आयुक्त डॉ. देवांश यादव होरें मुनिसिपल ऐनिमल दिक्खभाल केन्द्र रूपनगर एसपीसीए केन्द्र चौआदी दा व्यापक दौरा लाया। उनें ऐनिमल बर्थ कंट्रोल कार्यक्रम दी प्रगति दा जायजा लैता ते एसपीसीए केन्द्र चौआदी कन्नै जुड़े दे सिविल कम्में दा बी निरीक्षण कीता। उनें जानवरें गी दित्ते जा'रदे इलाज आली सहूलतें दा बी जायजा लैता। दौरे दरान मंदीप कौर होरें जानवरें दी दिक्खभाल आले अमले कन्नै गल्ल कीती ते लोड़चदे रिकार्ड बनाई रखने दियां हिदायतां दित्तियां।

<><><><><><>

Haj Committee

हज्ज कमेटी नै बुधवार इस ब'रे श्रीनगर थमां हज्ज यात्रा करने आले श्रद्धालुएं दे पैहले जत्थे लेई ब्हाई डोआरी दी जानकारी सांझी कीती ऐ। आकाशवाणी जम्मू दे संवाददाता दी रिपोर्ट मूजब अधिकारिक अधिसूचना दे मताबक पैहली डोआरी(एसजी—5304) 4 मई गी अपनी डोआरी भरग। पैहली डोआरी आले श्रद्धालुएं गी आखेआ गेआ ऐ जे ओह जाने आले दिन हज्ज हाउस, बेमिना श्रीनगर च बडलै 5 ते साढ़े 5 बजे दे बिच्च

दस्सिये जान। बाकी बचे दे श्रद्धालुएं गी ब्हाई डोआरी दे बारे जानकारी बक्खरी सांझी कीता जाग। इस ब'रे 36 सौ थमां बद्ध श्रद्धालुएं जम्मू कश्मीर थमां सरकारी कोटे अंदर हज्ज यात्रा करा करदे न।

<><><><><><>

CAT

केन्द्रीय प्रशासनिक न्यायधिकरण, श्रीनगर पीठ नै सोशल मीडिया उप्पर फैलने आली खबरें गी नकारदे होई जम्मू कश्मीर विधानसभा दे स्पीकर अब्दुल रहीम राथर ते विधानसभा सचिव मनोज कुमार पंडित गी कैट(CAT) आस्सेआ अपने पैहले फैसले दी पालमा नेई करने पर दित्ती गेदी चेतावनी आली गल्ल गी झूठा ते गल्ल आखेआ ऐ। कैट गी मिले दे इक संदेश मूजब 2024 दी इक याचिका नंबर 225, 28 अप्रैल 2025 गी सुनवाई लेई सूचिबद्ध ट्रिब्यूनल दे सामने लंबित ऐ। दस्तावेज च आखेआ गेआ ऐ जे ट्रिब्यूनल आस्सेआ इस चाल्ली दा कोई आर्डर पास नेई कीता गेआ ऐ ते लोकें गी सलाह दित्ती गई ऐ जे ओह सेई जानकारी लेई सरकारी स्ट्रोतें उप्पर भरोसा करन।

<><><><><><>

Ramban-Ayush(byte)

आयूष मैहकमा रामबन आस्सेआ लोकें च सेहत सरबंधी मामलें गी लेइयै जागरूकता पैदा करने ते बमारिएं थमां बचाह आले तरीकाकारें बारे जानकार बनाने लेइ इक पैहलकदमी दी शुयआत कीती गई ऐ। एह जतन खास करी रामबन च हाल च आए दे हाड़ें गी दिक्खदे होई ऐ। उआं मैहकमे नै प्रभावत इलाकें च मैडिकल सहूलत आला शिविर लाया। केई सारे लोकें इस शिविर च जाइयै मैडिकल सहूलत हासल कीती, इस दरान मुफ्त दोआइयां ते परामर्श दित्ता गेआ। लोकें गी साफ सफाई अपनाने ते पानी करी होने आली बमारिएं बारे दस्सेआ दयाया गेआ। लोकें गी क्लोरीन दियां टिक्कियां ते होर दुइयां दोआइयां दित्तियांगेइयां। इस बारे होर जानकारी दिंदे होई वरिष्ठ मैडिकल अफसर ते जिला योग कोआर्डिनेटर डॉ. मसूद इकबाल जरगर होरें आखेआ.

<><><><><><>